

槐野先生存笱稿

槐野先生存笥稿卷之二十六

左輔王維楨著 館甥渭上南師仲編

書三十五首

與何柘湖內翰書

與何大壑祠部書

與許石城太常書

與史沱村巡撫書

與孫季泉少宰書

與楊朋石光祿書

與鄭澹泉總督書

答喬三石觀察書

再答喬觀察書

與賈樵村督府書

答任崇山太守書

與喬三石觀察書

答南叔後吉士書

與徐少湖閣老書

與李古冲太宰書

與王三渠大宗伯書

答鄒一山巡撫書

答白幼權令尹書

與潼關王兵備書

答吳總兵守直書

答俞是堂憲使書

與孫季泉少宰書

與萬兩溪吏部書

與何柘湖內翰書

答吳總兵守直書

答康道甫太守書

答孫東谷大司徒書

答趙大洲同年書

與樊斗山御史書

答俞是堂憲使書

答薛方山憲副書

答趙方泉提學書

與艾西麓巡撫書

答俞是堂憲使書

答唐霽軒巡撫書

書

與何柘湖內翰書

自得與公游董董半歲耳而道術相投神氣相結顧
甚于訂夙昔之盟者由是觀之人士相知果不在新
故益脉脉在形骸之外矣足下以詞賦雄吳中僕每
讀其文以爲機雲之亞近睹未嘗有也第造物忌完
既右其才遂左其官不得蹈厲霄漢極萬里之志則
又乃名累之也嘆息嘆息僕度竟老一無所豎立今
而歸將依栖華嶽石室百年蛻骨在斯矣非薄功名
厭驅馳誠安愚適志之謂耳若足下弗遺肯况我以
雲篇惠我以江芷斯百年之欲區區之望也世事風
雨陰晴反覆不可豫謀然非知命履道之君子鮮不

坐煩惱障矣惟足下堅意守官毋用世故芥帶于中
若僕所思去則固有隱軫之痛矣非專爲避賢路也
舟中握手刺刺不忍別抵暮登岸投鞭于江浦明月
在庭顧影獨步知己安在寔用是悵悵耳從人回附
言布幪十分中一分耳前路有便更思陳述僕有懷
抱不與足下盡之其誰能亮之也

與何大壑祠部書

今僕旣渡江遂與公成各涯人矣海內知己指不可
數屈若吾大壑公者益無幾也回首南雲可勝恟恟
語曰人欲天不違何懼不合并異日者風雲若動潛

蛟再起彼其時神劍共匣雲鴻比翼或可冀幸有乎
顧僕方圖晷卧襲公高躅而慕向之浮世難豫岐路
多乖且不能卜旦夕矧後來者遠在十稔近在三四
年乎別日抵江浦明日暫留勞苦未甚蕪乃取公贈
篇讀之則淒然涕下矣安能言哉度前路距江東益
遠音塵不得達從人回附布離悰如此將發之夜具
有蘭絨一端相贈而送客淹坐不肯去旣去則又促
促治裝天遂明就輿而贈物攜在輿中今並以往見
區區之忱非偶然有也此絨頗真可呼衣工來令作
方袍用青潞紬綠領及四邊以蕪產玉色熟絹爲裏

則衆柔相得足耐久遠體輕而氣溫亦奉身養命之道也古人遺遠則重一端綺僕贈不如綺然繾綣之意則未始異也蒸溽中才一握筆揮汗滿把披寫不可具嗣布之可也

與許石城太常書

今者僕旣渡江而與公離矣念此兩歲中相過相歡之跡卽復若夢浮生百事皆若此寧獨離別哉行子發日令噐以公之命追送僕于郊關亦眷眷甚矣行子今從車上手公贈言讀之則回路之義而蘇李之詞也有才若此乃令之白首淪躓不得大暴所長歎

之恨之僕又以爲造物小兒予奪悲歡竟靡有恒風
雲若變無愁賢哲不再伸也僕今往且欲作山中人
矣會面無期而雲天悠邈情當柰何每歲江鴻北邁
幸惠德音悵悵

與史沱村巡撫書

自僕與公遇蓋在傾蓋之間矣然其披心見懷顧甚
于訂夙昔要白首者此其中固有真投冥契者存焉
弗可以形跡論也方今海上之警未已而蘇松大郡
悉遭焚劫獨江防稍靖耳以有公在故也夷酋不量
乃敢犯通泰自令失利而還可以見登壇之畧矣頃

聞公疏請募兵筭食斯兩者今之第一務也大臣仗
鉞在外去君門萬里身賭窳厄不以實告主上
非體也然此唯公爲不負耳僕所爲伏心于門下者
坐是故也公之長公子一秀才耳每見輒念其尊人
之責甚重也問計慮患至刺刺不已異日者得乘風
雲而濟時艱何詎不逮其尊人哉僕今往甚藉門下
之力旣饋之贖又予傳牒又遣使衛行眷眷依依再
三而未有已也使還因申報謝之私若此矣奎如灼
畛畝盡欲生煙不獨行子苦之也

與孫季泉少宰書

僕今既渡江而徑還關中矣乃三月中有長女之訃
至老親再三督僕歸其書曰我老不能遠遊汝可解
官來就我也僕得書惻惻不能忍朝夕則輒治裝且
欲挂冠去而會有移官之檄來此甚便歸計遂行此
五月望日也且行之一二日而人事倥傯不得取寸
隙爲書報知己令知僕消息既渡江逾淮矣從車上
念故人今往且將悠悠越絕音塵不得達可但已邪
乃頓轡山亭述近日之况與引身之故如此云在南
中既聞伯泉公已納之壙中矣尋又言未也果誰然
乎僕不能充執紼之役又不能撰黃鳥之篇愧歎誠

甚焉見仲泉公爲道惓惓旅人草卒無及別啟也計
三年不奉瞻對矣積愫莫由展紙上語十之一耳悵
惘悵惘

與楊朋石光祿書

僕慕足下之高風舊矣顧獨不得奉顏色聆教論耳
乃者僕發南中之一二日而足下至行子倉卒不能
脩謁圖一面之晤及發而出在郊關乃公顧肯偕諸
公祖僕于大江之許僕一見之昧昧有愧心焉已又
謂古之敦交道者猶且神交夢尋况僕行在斯須倏
而別卽隔在千里矣柰何論形跡較新故乎公蓋修

古人之道矣顧僕非其侶也僕今旣渡淮作路中子
矣炎途灼爍行子不能前適憇一亭坐而念貴僚諸
公皆才者而又有大洲公來也以其間追游山水吟
眺陳踪卽號爲仙曹可也安得剛風搏軀廁我于其
間乎歎慕歎慕卒送僕者回南中附言申謝并具中
曲之戀若此今剛風旣不肯搏我軀而浮雲又復蔽
空江天回首渺渺神馳

與鄭澹泉總督書

今僕旣已渡淮次王莊驛矣昨在南中時奉公書訊
纍纍盈幅尺而憂國哀民之感顧居十之六七其時

會僕有長女之訃至旅懷鬱鬱不能爲言報謝也念
今且遠去與公益渺渺絕矣竟不爲言以謁別故人
安可乎適鳳陽留守素吉之使者在行中僕乃以書
附素使而令之馳走淮上投焉見鄙人雖往乃其志
猶依依于左右如此也自僕渡淮歷淮北諸鄉縣所
在頌口嘖嘖靡不道開府之德者以爲往年中原盜
起時我土之人蓋首嬰旣刃焉而又值河水沒田民
食半菽苦矣向微開府來淮以北赤赤矣由是觀之
公益有吹枯扶傷之仁再造生靈之德鄭氏之門閭
雖百世益大可也僕發南中時蘓州之圍尚猶未解

夫去年之旣絀于松江今年之旣中于蘓州斯兩郡者非凡郡也而夷旣踵至大家走保城中小家流冗他縣民不得耕種且無論閭閻蓋藏卽租稅安從出哉此可爲寒心者也夷酋數侵暴海上然不敢再犯江淮者獨以開府在此故耳頃嘗一入通泰矣輒至失利而還此所以戒不復往也僕私竊譬公如倉公國手病者及門輒計日而愈蓋才性天畀智畧神效非可數數有也顧公不能化百身以拯萬靈而海上之旤牽綴而未有已時願公少出禁方示海上用事者異日者海上之民活卽公之德海上之租供卽公

之力柰何恤形跡之嫌而不顧大計乎第未知海上
用事者肯聽邪不邪僕今馬首西向將投鞭華山之
下卧矣然猶嗷嗷聒聒掉舌世故而不肯下者以公
憂國哀民有古大臣之風所謂彈劔缺于張華之門
鼓七絃于鍾期之側誠有所乎契不當與迂誕者同
日論也

答喬三石觀察書

使者來適值治亡女之喪又並遷亡妹壙兩者皆痛
心事不能詳問足下近履然使者但言其伏苦塊也
足下志欲豎石表隧顯揚其先世之德令永永不沒

焉此孝子之情也乃以文問僕非其當矣僕不幸未
嘗獲望尊甫翁伯之面然壤界相接頗悉其行實固
必假手于中郎之碑托詞于陳思之誄乃能闡發幽
懿示信來世僕何可輒奉教也僕于其痛間時嘗取
公所爲狀一再讀焉蓋遷史之體而藏山之詞也古
亦有自述祖德者矣卽此可以傳久遠矣又柰何別
有請乎僕雖守在詞曹典紀述之事然時一有作輒
就焚弃謂不可示人耳今公要僕爲隧頭碑路人過
者皆見之適足以暴醜增嗤于喬氏未有光而更且
抑蔽之也願公改命擇能者而授之語曰朽者形不

朽者銘豈得草草哉唯公亮僕之心非出于避後察
僕之詞非依干僞設幸嗒然笑而允之僕何異釋負
擔哉饋至幣儀不欲附使歸須有間崑致之也日下
炎暑如坐大爐側唯保攝自玉斯文之托今在于茲
非諛非謾

再答喬觀察書

頃僕所爲退退不敢承公之令者本非有他誠自審
其弗可也乃今接公讓書謂僕欲要公身請之妄自
尊重僕非敢如此也僕得從公游最久而相愛最深
秦俗閭里有喪葬之事有財者賻隧有力者負土增

墳僕旣不能賻襚又不能奔而負土又且典在筆札
卽効一詞固當焉顧獨念公文詞宗匠遽而趨役將
恐其操斤而傷手也再奉督命竟期策力往矣昔人
有驅孺子而抗寶鼎者傷或止之以爲卽不愛孺子
柰寶鼎何願公重惟斯義而已自入里中懷抱旣惡
而亢陽更甚遍體發痱成瘡尚未脫甲以故掩關謝
往來于人事都絕矣使者自有口非誣計公襄事在
仲冬僕有誤當以前月往未有食言漢季子也小女
兒亡此區區私痛何敢勞足下知之且加之奠休戚
眷眷之情比之骨肉附謝不可具得面乃盡也

與賈樵村督府書

始楨歸華下卽計走使申訊乃輒以骨肉之事奪之居兩月而使者來稱饋歸人旣發鼎翰故誼悵悵依依至滿幅尺楨汗下淋漓矣楨客南中歷二歲乃不以尺書抵左右形跡則踈且怠矣顧江南塞北相望數千里雲天悠邈駟使不道卽書安得達所幸明公知己不坐之臯柰鄙懷皇天何往明公填撫關中關中之民帖然靜愿如卧枕席此外內所共聞也乃今移節塞上令其西秉玉關之鑰而北築高關之城則天子知人有司體國並在此矣楨喜之甚唯獨念兵

弱而食匱罰重而賞薄尚猶費主將料理耳夫以弱
兵當強虜枵腹任干戈已無賴矣又使將吏見威而
不見德內懷首領之念外圖徼倖之功此邊事所以
債三軍之氣因之不起也楨嘗拊髀竊歎思一叩閣
而未敢言者也明公才畧威望實冠一時旣已使旗
幟精明控弦之士泯泯生氣矣楨所慨噫者爲諸邊
之通患云爾往楨在南中數見倭寇犯海上卒莫之
禁而二三任事之臣又平日兢兢于文墨之論者楨
以是又知天下之患不在北虜正在南倭也方今公
家多事人務自効至楨獨未焉愧之愧之頃之且謀

在言希
卷三
十一
上書請告引跡安愚爲賢者避路不欲甘心于乘軒
之鶴巢閣之鷓竟已也楨違曠旣深而明公再領大
柄又不得身爲賀柰何使者還報附書申謝且以明
賀焉唯亮在不臯幸甚幸甚

答任崇山太守書

江浦使還業已有言申悃計徹左右僕自入里中登
堂拜老母老母坐哭孫之痛容狀颯然頽謝非舊日
矣僕心誠傷之若創瘡焉已乃葬亡女葬之歸三月
意忽忽若縣旌未定頃之稍定而室中人又被疾日
在檢方和藥中矣士生出則涉江海冒險阻博一官

之榮而樂不償其苦入則蹙眉含悽仰空而咄咄由
此而望百年弗可幾矣以故焚弃筆硯及諸人事皆
一切罷之誠懼諸難攻心損齡促筭令老親靡托耳
以故受令爲文久而不報非忘之也適紀丞以使西
來責宿諾僕見使者赭然汗下不能出一語然使者
實睹僕鬱鬱吁吁也使者的既留一月僕乃抑情披抱
尋繹前狀據而爲文畢季布之信焉至其詞則未工
也嗟乎文章之道亦難矣僕焉能知而公又故詞林
哲匠難與爲言其爲割正可也僕依老母側且將爲
終焉之計老母不耐遠游矣人子事親以順爲孝卽

若老母亦如太夫人之安于逐子僕獨柰何不奉板
輿博五斗而從園中栖乎僕辱公知己最深休戚共
之恐公欲知僕動止附此白之云

與喬三石觀察書

今僕所奉碑役旣已訖事乃遂函而遣使馳上懼不
及期反得臯也碑所具詞十七皆公之狀所謂物之
至者無以加也其不能盡取者有說焉竊以封君大
節多皆古人之造近世所稀睹者其諸懔懔兢兢閭
閻丈夫可庶幾者率畧而弗錄不欲以繁枝密葉益
合抱之材也顧僕荒陋闇沕不能窺識高人之微而

鋪張散亂又甚無緒理文成私自誦之愧焉思欲點
竄剝削令歸班列而卒不能罷之蓋其才乏也公文
章宗匠又孝子之志所欲揚其親者唯恐弗備乃僕
之爲碑若此何以復惓惓意也曹植有言文之好惡
吾自得之卽更竄何惡焉唯公循沿古道而加之刪
定此不直區區受教且不貽石上災矣幸公念之本
圖會葬適有霜露之疾遂止中懷耿耿使往因附祿
贈之儀誠知弗腆聊以見朋友之私耳竢大事旣訖
當更使使上慰茲不具述云

答南叔後吉士書

往僕犬馬之日至乃辱使使銜幣來賀惶愧之甚生平半百曾微有咫尺之効斯須之譽以表見于世私自恨爲太庾鼯鼠詞曹贅疣宇宙之偷人也柰何當賀稱邪使來時會僕避客野中未嘗以筆硯從未報乃後數坐塵溷中遂滯而抵于今矣足下肯亮之所惠羊果旣以入唯幣二純乃馳而璧返非敢固卻誠懼其未有當也僕以老親不欲遠游之故頃已上書陳情圖畢菽水之私遣一价往矣書中丐詞皆吐出肝膽上必念之許可矣苟竟如願則少華之曲清渭之濱采蘭求藥浪跡自由或有叩關相訊日也

偶不自慎被蒙霜露之疾又書旣上卽稱爲山中人
矣義固在掃却宜也然于親屬又不當以例謝故此
復用尺牘申致區區云爾君家兄弟歲試皆得意獨
仲君稍蹶耳頃之有大申時也附此賀焉

與徐少湖閣老書

日者楨得北徙也誠賴門下吹噓之力蓋謂北人不
便南徙之而從其便者此其恩德深重萬之恒情刻
骨而未可忘也五月之季旣以渡江北首矣乃復念
老母離背日久而又重以失孫之痛乃遂枉轡入關
且因請老母俱來也不謂霜葉早凋夕陽易下一年

不見遽爾頽容當是之時楨悼怛在懷然猶外脩存
慰大畧言今日所以光顯其親者皆從宦中得之卽
甚老有安車在也固請與北而老母固不肯應楨以
違願之事非所以養老乃遂具疏請告遣一价往矣
伏望門下隱軫慈悲令遂所圖則母子相依始得附
于人倫之列史臣不與絕裾之子而多陳情之夫蓋
謂忍人不可以事君而薄于親者又安能厚其他也
楨竊自惟省十年以來被蒙門下之教非一種數矣
乃今輒爾請告天路邈絕瞻侍無期楨么麼固居下
客之列豈無戀舊懷哉顧執有所阻情有所奪獨且

柰何楨故守史官諳其職矣卽令楨伏踪家園猶當以朝夕之間攬采門下匡弼之業康濟之德萃而成編雖不敢妄謂藏之名山以傳來世然以資延訪備缺漏庶與裨官小說類也語曰士爲知己者死楨也無死所持是卽所以報知己矣唯垂明鑒而憐察焉

與李古冲太宰書

不奉光儀數易伏臘瞻望如何前楨上疏陳情益倒出肺腑矣私計明公燭照海內物無遁情楨抱區區若此當必亮之客自北來者乃云明公日侍直廬上承 燕封奉筆扎至廢眠食忘旦暮焉益倥忽甚矣

楨以故雖鵠停望報然聞其若此則未敢以私懇也
顧獨念日月不留程限易違誠知明公保惜人才甚
于護璧然鄙生憚法畏事自不能不耿耿耳楨自少
小遭罹凶疚者屢矣積憂在抱痰火時作一發輒不
任乃今又復發什于往時乃茲伏在牀蓐百念皆攢
楨皆能遣之去唯獨謂進退之迹未明則廊廟山林
將何號吾此楨所爲中夜拊枕而興嗟永日掩關而
含戚者也伏冀明公照察愚悃大發慈悲以其直廬
之間取楨前疏早賜施行則楨私願旣諧公法不撓
兩之皆得其荷佩恩庇當與骨共朽可也自客歲以

來大宗伯渠翁凡遺楨書輒道明公惓惓不肖之意
劇于收簪楨誠甚感焉卽令楨退依家園遠跡雲霄
之間楨豈敢忘知已哉矧公以道德文章擅名天下
四方野儒苟有聞者猶當紀述以傳楨又其故史氏
哉楨不文尚思攬采明公方潤之餘粹而成編以報
知已非調語也唯垂聽而憐察之焉

與王三渠大宗伯書

鄙人楨渡江情事業已具杞縣書中矣及旣歸來而
拜老母老母逾年不見遽而頽謝頽狀齒髮大異曩
昔楨仰視泣下而老母亦歔歔者久之其時楨卽誓

言終養以畢夙志以慰北堂之心居有頃復有獵心
誠家人治行吾將之官因請老母與俱而老母固以
羸老不任駕馳爲解綿歷四月竟不肯許楨於是始
具疏陳情遣一介往矣然非其得已也方今 聖明
御世海內才賢側肩而上公車者不可勝數楨獨何
心乃肯引躬竄伏自失風雲之會邪顧理有所阻情
有所奪世未有二心之臣可以從宦者此疏之所以
奏也竊恐他人不察造浮言以爲楨有異懷以熒惑
當塗諸老之聽令楨所奏寢格而不報則區區之志
終莫之白矣所幸門下同直西內得朝夕相晤承間

肯一開口明楨所陳乞者皆吐出肝膽非有覘候希冀之私如此則請無不得願無不諧楨所爲戴門下之德者卽剖心磨踵不足以況其誠絕纓伏劍不足以比其堅也惟門下曲軫慈悲不勝延佇

答鄒一山巡撫書

使者當此嚴寒之候至踏冰雪歷川嶺入關而問訊區區斯其爲情殆萬之恒調矣鄙人楨手翁惠書蓋咨咨感歎者久之以爲近世交道衰薄矣踪跡苟殊則膠漆輒解矧其人乃一日之好而又隔在千里外哉今翁所睠顧楨者有古人折芳遺遠之義第楨莫

可以當之耳。楨，關下鄙人也。自通籍以來，竊亦有志于當世之故，以爲駑馬不能十駕而鉛刀或任一割。日夜磨礪，思欲妄試臲躄其本圖也。顧唯念老母年七十高矣，而楨乃獨子，鮮兄弟之親。楨齒髮且晚暮矣，而又未有子。今老母倦遠游，楨卽戀名爵，不忍棄。寧忍奔膝下哉？頃已遣使上書請告闕區區之私矣。苟幸如願，則楨故守史局，嘗諳其職矣。主在論撰名德，揚幽懿也。若如尊翁先生之銘與東涯公之傳，悉皆史官所領，此而不紀，其又爲誰効筆硯也。顧楨觀翁所撰二文，咸極詳贍，實不加點，所謂大呂在庭。

則瓦缶輟響可也僕安敢前効哉雖然郢曲洋洋秦
鼓鳴鳴亦各自寫胸臆云耳竟須効役于筆硯間也
楨方今掩關埽軌嘿坐而待報幸有 詔可其奏則
將采秀于嵩丘問道于河上凡可以益親之筭而蕃
吾之胤者固不憚遠涉重胝也彼其時或能見翁于
道傍以申宿昔之抱益非飾非謾矣湖海知己屈指
幾何瞻望雲空可勝悵惋

答白幼權令尹書

往僕在南中見邸報知足下不利然不恨當事者之
苛虐不肯少貸顧獨恨足下之深焉日者僕歸華下

聞貴邑新貴率皆燁然震烜往來于市衢而足下已從田中伏矣則於是又大恨之且歎之焉僕嘗語人曰我如見白君則以口齧臂肉寫吾憾也顧僕歸來卽值有亡女之痛乃其後益之以諸俗終日擾擾無解脫時以足下不能走而東卽知僕不能走而西也適奉翰扎中具恂怛幽鬱之懷蓋所謂來復時也嗟乎晚矣翰云不怨林栖怨莫以消歲月者然哉然哉僕竊觀四序逋遷日月出沒草木榮枯人世死生斯四者皆恒道也夫功名進退亦猶夫是耳昔人不察至坐而書空懊惱以殞其性此無見于元化至理者

也且近世以罷免歸者往往沈迷于杯酌歌舞之間以爲不如是無以度吾年也然爲身計則快于風俗大壞之矣令後生何觀焉足下卽欲求實物可消歲月者則莫如讀史夫史記事之書也上下千萬年善惡賢不肖是非興壞之跡皆具焉讀之令人弗倦積而久則胸次洞豁遇事輒曉又于其中采其涉大節關大訓者彙而成集藏之名山亦可以命世傳永稱不朽之業矣又何羨飛纓躍馬仰齒貴游哉鄙人且欲作山中人矣亦將持是而送餘年故所以復足下者如是而已少華谷深山人所居不復與當塗之君

子通來往少選春生足下如肯問山人踪跡則當采藥苗釀春酌攜向谷口候西來騎也具有不腆之儀聊用爲壽非以言報李也

與潼關王兵備書

頃者得奉光儀甚慰夙昔顧客心爭路蓬踪易轉晤言無幾時而輒復別去柰中懷怏怏何使者肅公之命爲護行車甚謹會天新雨路傍流潦瀰瀰如行鏡中而時又晚暮東方月出而浮雲又來薄之車人相呼戒嚴亦不及于淖旣官卒持篝燈至車人轉蹈于淖者至再乃知糶糊者滔滔利往而洞徹玲瓏或不

免一跌之虞也僕侍公教才斯須耳然大槩頗窺矣
蓋倒瀾之孤柱而絕塵之獨駕也所恨至人難遘後
會不可期歎息歎息使者固請送僕抵都門而止僕
病淹逆旅發期尚未卜乃力勒之還令報命門下因
附謝私若此所未具者嗣布焉

答吳總兵守直書

頃鄙人過真定始知吾子領節鉞分守居庸蓋赫然
顯盛矣旣入京而王銘輩諸生來見又復言之鄙人
以一時同榜之士非少然今歷顯盛者無幾何吾子
其思所以効節報主可也使來問訊惓惓可知但

居庸號稱要害視他關萬之將領枕戈而卧士不解甲而食乃爲得之况今又屬秋序胡虜且冉冉生心矣能無懼乎鄙人近颺然衰矣再登霄漢甚愧效顰竟亦投劾西歸而已適覽諸公保語一一皆寫出吾子之竒鄙人益喜之甚昔李蔡出廣門下十餘年位至封侯而廣卒不封嗟乎誠使門下有如蔡者卽鄙人退依蓮華山下何憾焉願吾子勉之庶慰期注

答俞是堂憲使書

行子及白溝得奉所留嘉訊乃知公所惓惓于僕者與僕戀別訂合之情固同之也保州之會雖斯須然

公轍跡遊歷之遠艱難辛苦之狀僕旣以識其大都
矣語曰黃鵠四海斥鷃籬落言才與不才異趨也願
公毋甚以爲勞焉僕留保州一日得盡讀所惠集終
其編總之皆澹然自得之趣與世之勦襲雷同者當
以雲門瓦缶論也至其意格則自創軌轍耻踐陳踪
北地李先生每以尺寸古人爲宗指難與公同日言
矣又詞家尚風骨謂肌膚百骸之所會感物効情之
所將耳少陵坐是而因寡孀然之態近來詩人頗少
之乃遂幡然回首喧喧乎向韋柳之門矣僕觀韋柳
詩誠澹雅不浮讀者一過輒快其以書懷述事莫尚

焉蓋與少陵異製而同情也古人之言曰天下一致而百慮殊塗而同歸何必其法之似哉公詩在韋柳伯仲之間或又有步驟少陵者蓋總統之才龍蛇之德也卽令韋柳而在亦不得以獨逞也僕闇沕無聞不閑于詞賦之科茲所爲復者猶之瞽者辨色聵人論步秣博有識一大噓耳賤恙稍稍去體尚猶在醫人手中承軫念附此謝焉

與孫季泉少宰書

僕自南中歸且將白首華下與松桂老矣乃上書不見省而部檄督赴官甚嚴仕宦牽絲不能一割而決

乃今又復驅車出谷與青雲之士共翱翔焉非其志也僕觀世撫已度卒之安禪旋且返我初服而已吾兄醇德厚養一出當爲縉紳之表執政諸公方擬虛端揆之席以待焉鷓鷯一枝鳳凰千仞則亦各遂所圖焉耳唯足下夙戒行李居有頃驛書至矣自不奉顏色輒歷四秋然忽忽若經朝暮唯鏡中容鬢非復故時浸浸乎向衰頹矣明年僕滿五十稱半百人矣濛汜漸逼而尺寸無聞每于終夜聞寂剪燈孤坐有慚憤之懷焉昔人有持寶劍不售者則亡之他境謂劍不售且得既僕靡有重持卽不去無傷然麋鹿之

性終戀豐草非敢效百舌反覆以誑惑故人也令噐
吉士君有美質然又肆力于學當有遠詣僕見之以
爲謝氏之玉對不啻也顧入京未幾何時乃卽有秋
試之役役事旣訖卽又多人事擾擾也不得與吉士
君語第從吉士君頗悉足下起居耳海寇暫息知足
下得安枕玄廬冀紀事抒情之作必盈篋笥能無以
遺知音子邪僕在山中一年但日事道遙游不理筆
硯久矣乃今八月舉一子此清心養氣之明效也念
足下恒爲僕軫軫之慮附此以聞茲役草草告成
事以言美善則未也錄一冊附奉覽教

與萬兩溪吏部書

今僕又復驅車出谷與青雲之士相翱翔焉檄書相督而守盟弗固其視鑿坏之子何異僕居南中且兩歲從公論議之後不以僕爲鄙而時時接引之每念一及輒黯黯神迷焉豈所謂傾蓋如故者邪方僕在南中時則思關西今在燕山又復思南中此何以故也僕蓋甚難言之矣容有赴南中者聊因致繾綣之私併順天試錄往惟侍教會面何時而縮地之術又莫有傳者悵然悵然

與何柘湖內翰書

客自南中來者輒能道足下起居之槩以爲君家昆
弟不謝二陸乃知雲間才彥代生不乏今至兩何益
犖犖出儕輩遠矣歎之慕之自僕歸依華下已甘心
白首矣乃上書不報而檄書又來督赴青雲翱翔豈
僕之夙願邪尋亦旋返初服而已邇來荒落不理筆
札者一歲餘矣乃令之校文安任焉盲子辨璧以校
文則似之嫫母畫眉今錄所具者是也唯覽而教之

答吳總兵守直書

使來餽裘襪蓋謂寒至而此能禦之也遠念勤渠至
于如此感甚感甚今秋胡虜南侵距關門不至者四

十里然而逡巡瞻顧不敢直犯者人言籍籍皆以爲
東鉞諸臣之功至如八達嶺最稱通賊要路虜不犯
居庸而亦不敢近八達者則誰之力歟適睹來札乃
知纖悉鄙人則拊髀歎焉今之論軍功者率以先登
爲勇倂斬爲奇至夫先聲奪氣之勳不戰屈人之器
盡弃而不講此將士之所以解體而武功之所以弗
競也吾子今日守嶺勞苦如此事定當必有爲表其
功者顧今俗是非淆而名實頗乖於是通滑奔競之
徒得志焉語曰苟利社稷所在以之唯吾子勉焉此
輩通滑而奔競者或時自蹶忠義之夫神祇將祐之

竟有佩印登壇日也鄙人入京未幾何時乃輒承校
文之役亦莽莽卒事耳以言美善則未也吾子所稱
慕我者殊非區區所敢當也使回附言申謝并以順
天試錄往檢囊羞澁莫可以將報李之私者愧之愧
之

答康道甫太守書

使者來守誌業已歷兩月久矣其遲遲不遣者寧稍
有怠志哉顧僕一出棘闈輒坐人事中不得間一往
一來錯施而橫至塵勞如此乃令操筆而構詞焉能
乎居頃之又屬遷次乃又復擾擾而使者望見往來

人甚苦之然又不敢前而白也於是僕乃筭葬日漸迫矣條而怖于中懷遂力謝人事卧閣中踰日誌乃就篇而續之銘殊愧乎不文也不能章顯幽懿遂孝子之情以求貽來世之休也如足下有未足不妨潤削要在信今傳後而已狀所列斤斤皆實事可錄然紀述之體有五忌三俗五忌者忌腐忌冗忌複忌迂忌乖刺弗合三俗者俗意俗事俗格僕爲避五避三也以故摭狀中可傳者著于篇不欲以講張汗漫之詞反沒仁人君子貞信不疑之行也僕守在交戟之內不能東走備紼謳之役甚以爲歎誌旣已付使者

歸報矣柰此心耿耿何所具不珍之幣二列之別扎
附于古人贈賻之義云爾

答孫東谷大司徒書

使來奉翰既故誼悠然感甚感甚翁洛陽之長者僕
幸以壤境相接之故乃翁忘年而引與之游且至出
肺腑相示焉僕每念之未嘗不惻然嗟歎以爲近世
所稀邁也僕于夏杪入京未幾何時而輒有校士之
役思欲因風問訊安能乎役事旣竣於是具書及錄
附吳客便致之門下今能達之乎不也竊惟門下素
節比之勁竹直叢震乎域中客或有談及者咸肅然

振容重之乃翁欲引年歸洛中恐不得如願以衆望所屬故也僕碌碌不逮中人往疏陳乞養本出中慊而固不許於是又勉而出焉頃得家書老親偶感風露之疾兩地相懸情其柰何立即上疏西矣乃其始願本若是也私憂大重神爽飛越搵筆布詞不知所云唯亮察毋臯幸甚幸甚

答趙大洲同年書

前吉陽何君言公欲遣使來京報謝故人適果至焉夫俗格已就卽有豪傑不能自脫公今乃甘心蹈之是矣頃見介谿元老元老出公所貽書示僕極歎其

文詞焉以爲有古人風於是內江聲名出關中上矣然內江固自信讓關中爲其筆有檢制而辭不漫施也書所比况楊文貞之奧學楊文襄之文采劉洛陽之葆真李南陽之贊襄可謂得其似矣然唯公乃能有此評訂區區實不能道也蓋公博稽掌故因而上下其人物耳僕何知焉因使者又知饋諸公幣亦從腆非薄頃僕入京第用羔鴈通私覲之意耳視公所具益覺繼晉不成觀聽或詞林故事亦當若是也但僕絕所爲喜者以公負當世之望乃其志又犖犖不與庸衆伍此所以忤于俗也至于今損易肺肝追逐

于塵垢之中所謂龍蛇之義合于易道依依乎造聖人之域矣豈易能哉又雲霄舊侶往不爲內江公喜者亦謂內江公能與世推移不疑滯于物聖人之徒也僕頃得家書老母病伏枕席間五內摧裂若受鋒刃業已上疏請告矣有如旦夕得命卽躍馬西矣世塗梗泛執手何時悵悵悵悵

與樊斗山御史書

頃者家僮過真定辱公遺之書僕讀其詞居多獎予之指鄙人何可當所云也前僮西歸者計在開歲之首乘春氣融暖輿老親就京師此本圖也乃老親忽

感風濕左體木而不仁今僮來爲報此耳天涯游子
歛而得此信情當何如言之淚淫淫下矣信至乃立
卽草疏奏于上而執事君子故泥而不行獨且柰
何僕有足不敢裹而西走有身不能化而爲流雲飄
風又青禽不至黃耳未有則誰與問庭闈也僕今塊
處門內日日籲天拜斗爲老親乞憐外事一不得聞
頃之客有言後數日僕所請當如意者僕忽解顏拭
淚而誠家人治裝令之先發僕倚馬須上命耳苟
得之卽揚鞭馳矣家僮數過真定並以公廣屋烏之
愛得不留行幸足矣乃又賜食賜粟恩數稠疊此皆

弛嚴而存故恒情所未睹也感甚感甚適家僮持裝者去附書申謝於邑彌襟殊不盡曲折也

答俞是堂憲使書

自僕入京未幾何時乃卽有校士之役比役旣竣又復居塵溷中思欲以試錄往者屢矣然未有因也而私心恒念之竊以爲西麓公使當來可因而致之乃竟不來海內知己如足下者可屈指而校也錄卽不文奈何匿醜不以遺知己哉非人情也頃使者投足下書顧譽順天錄特甚僕愧汗淫淫下及踵足矣僕關塞間鄙生也雖濫竽詞曹而實不講于文墨之事

乃足下命之撰夫人銘僕安能任乎僕讀足下所爲
夫人狀咸說實道有不溢一語又其法度纖密意脉
聯絡馭乎上薄荀悅而下陋歐脩矣有文如是乃
令僕視而爲銘恐蜀錦製鞋非寶布所能緣金柱爲
冠非胡纓可作纓也僕安能任乎然念夫人相夫之
行匹于齊國鷄鳴之子而好文知禮卽咏玉階歌紈
素者未能相後先也古太史氏典在記述賢人君子
之節與夫貞婦淑媛之美乃其本事僕以此故輒復
任之弗敢辭亦以重足下遣使加幣從遠道來厥意
懇懇然也僕適以老親寢疾在家書來督僕歸於是

僕疏請歸乃不幸不許令僕從別計歸嗟乎仕宦之道如牛就羈一前一却信夫人爲之耳此豪桀之士所以力脫樊籠而掉臂不顧也僕發軔不出五日內矣日夜念老親思得一伏榻前問安穩不啻若渴鳥赴水駭鹿投林也六府盪搖不能捉筆以復足下之命須抵敝廬私懷稍定當圖所任也非怠非謾

答薛方山憲副書

使來奉公書乃知僕旣發鄉而猶屢使使存問何其厚也方僕與公爲華下之會時誓將白首山中老矣不謂檄書再至責僕愈益急僕本塵壒中人也遂因

有躍馬心以故抗顏復出計將効尺寸以酬夙昔耳
乃今入京無幾何則輒有校文之後廿年勲名不出
筆硯間愧之愧之今公幸離弃文墨講戈馬之事矣
乃茲復徵之典秦闈焉雖執事論長然終罹毛錐之
誚未可倚以畢百年也僕自竣役來僅五十日竟日
在塵溷中乃忽得家報老親今在藥物中矣天涯游
子情其如何乃卒卒上疏陳情附于令伯依劉之義
疏下吏部吏部固不肯覆而僕服在近列又不敢拋
印綬去西望雲空徒有洒淚號呼而已頃之有肯爲
僕圖便計者旋當西轡得見老親于榻下僕今塊處

戶內聽有力者爲僕圖之然意緒搖曳無異縣旌也
使者來取報安能布辭乃勉爲之如此云頃在戶內
當路諸公有顧僕寂寥者僕以語次頗及足下前事
而當路諸公云前事業已明白武進公特執法太嚴
耳未有過也凡歷十數公言出一口若是則曾參果
爾不殺人矣何又以疏請引避爲乎僕讀足下疏甚
有意義且白璧旣別亦無苦怨蒼蠅可也使者奉主
人令固欲上疏僕等固止之以故歸毋加譙呵以爲
聽外人言有兩心也

答趙方泉提學書

齋錄使者至獲奉翰教至盈幅尺纏纏數百言咸皆
悼離追故之義僕誦其詞至爲喟歎者久之嗟乎今
俗交道之薄甚矣安得有敦古人之風如足下者邪
僕自南中歸依栖華山巖洞誓白首老矣乃檄書再
至責僕甚急又老親自謂強健輒令僕赴官僕不得
已乃洒泣出門獨以二三健奴從而留內子輩侍老
親計且入京徐爲之圖耳不謂頃得家報老親以九
月未偶感風濕寢疾在牀蓐書來督僕歸僕得書之
明日卽上書陳乞復理前指而執事君子固不肯覆
奏僕今服在近列去留一聽 聖斷不敢拋印綬逃

去又不習長房縮地之術一蹴而侍老親之榻又不
能爲三足鳥萬里流雲飄颻自由而靡所拘礙至于
今獨筑筑塊處旅院俟執事君子爲羈人裁之耳人
生進無裨于國退又不獲奉家私尚得稱爲士邪愧
汗淫淫下及踵足矣適來校文之役本乃代匱居山
中一年未嘗治筆硯事規令之操觚効技所謂貧女
積綴富姬見之而掩口者也念錄已傳布不得匿陋
錄前旣托便使往矣計此時當必達之左右非以博
刮目之譽聊用爲抵掌之資耳居頃之僕竟可得歸
一卧家園山川悠緬音塵遂阻言之惻然使還卒卒

取報聊此布復之焉

與艾西麓巡撫書

頃僕過真定辱公之眷愈益深重斯蓋不棄敝帷之意以爲我臯微故置之不深校耳柰此心慚慙何頃僕早夜所言悉吐出肺腑矣念公濟時之器固須與時周旋不宜有所牴牾至若鄙人則慙直天植猶之栢心竹節莫可移易一出國門則麋鹿之性適矣豐草長林任吾鳴眺第所不忘于懷者唯重負君恩食大庾二十年餘茂有須臾之効尺寸之裨乃所爲恐恐者耳或言僕竟復進者則乃朋知交譽之私僕

分白首山中久矣殘編故劔倒置敝篋專爲老親求
神丹訪靈藥換骨還元悠悠至百年足矣足矣駕高
車飄華纓赫奕出入令都人辟易僕固能致之然有
私念奪之也使者護僕行及邯鄲蓋盡真定境內當
返矣而楊鸞持公之幣來餽僕念其義重受之而王
芝者領二卒更欲前僕力勒令與楊鸞偕歸蓋過此
以往飛馳而西不得更事筆硯脩報書也逆旅中草
草言不盡私唯亮在

答俞是堂憲使書

頃僕至真定而使者復持公書及幣來貺眷眷之誼

至于如此僕今往連日夜馳者非以赴官之急爲省視老親疾耳中心皇皇恨不身生兩翼足攝流雲也乃足下欲僕從道中奉筆扎之役僕非敢有避却意也僕所過實不能斯須留卽道中所經山川雲物無非忤懷抱者矧以抽思構詞撰幽貞之德發燁燁之光邪固須抵關中謁慈闈情事稍定乃能畢所委也斯指已具前報書中矣乃聞報書未得達足下所故此又嗷嗷云頃會西麓斗山二公極稱足下南產也而諳于戎畧異日者擁節鉞當一面則取之并陘足矣而西麓又數數稱其詩焉以爲有郎士元之婉麗

劉長卿之清潤近世操觚之士所稀覩也若然則古
所稱文武吉甫者此非其類邪僕今在車中恒手足
下惠我詩誦之藉以暫遣於邑之抱亦可以見至寶
所在卽昧子豁目愁人破顏也適次中丘已漏下二
鼓矣行子倦極展布不得悉嗣致之可也

答唐霽軒巡撫書

今者僕歸而侍藥庭闈蓋未嘗一日不流泣沾衣也
適奉嘉貺號之曰賀僕念於邑在抱此安可領受之
哉乃遂附使璧歸亦特門下洞悉人情當能亮區區
也又僕往來兩都數辱惠問動贖帑藏若干金卽他

往來餽貽又不知其凡幾數矣彈丸小邑恐不能給
矧今歲大侵斗米二錢倉庾旣匱而帑藏又虛有司
假以實倉爲名朘削富人之財不顧見骨富人叩胸
呼天靡所控訴凡此皆以冗費多而節約寡也願公
憐而察之卽僕不奉嘉貺而百姓蒙賜獲保生之幸
僕之感德尤愈于百朋也率爾晉言誠知越俎然念
士人出而應世在內則言內在外則言外苟利國家
遑恤其他唯足下裁省而寬宥之耳

槐野先生存管稿卷之二十六

槐野先生存笥稿卷之二十七

左輔王維楨著 館甥渭上南師仲編

小簡五十首

與王鳳泉先生簡

答吳柳濱先生簡

與張南溪巡撫簡

與南姜泉儀部簡

與徐少湖少宰簡

與朱碧峰先生簡

答謝畹溪巡撫簡

與張太谷中舍簡

答鄭一山督學簡

白里中親友簡

與顧六泉督學簡

答彭豫齋大叅簡

與汪春谷太常簡

與張南溪少司徒簡

答鄖陽任巡撫簡

答劉一軒侍御簡

與孫右川太守簡

答盧書菴方伯簡

與盧涑西少司成簡

答傅應臺巡撫簡

與饒仁菴太守簡

與張重卿太守簡

與王三渠少宗伯簡

與劉月山少叅簡

答周石崖憲長簡

與尹朔野太守簡

答謝與槐少叅簡

與喬三石大叅簡

與趙守朴大司馬簡

與張東沙少司馬簡

與謝與槐少叅簡

與徐儀岡給諫簡

答韓苑洛大司馬簡

與張元洲兵憲簡

答任櫟山太守簡

與張石渠給諫簡

答閻濯溪侍御簡

與王子臯給諫簡

答姚惟貞侍御簡

與王思質巡撫簡

與何太華總督簡

與許少華巡撫簡

與薛方山憲副簡

與趙大洲光祿簡

答王仲山提學簡

與唐霽軒巡撫簡

與趙大洲光祿簡

與王穉川少司成簡

答任櫟山太守簡

與薛方山憲副簡

小簡

與王鳳泉先生簡

楨庸瓊進止亡關一二親故見今身跡如此迺取昔人捧檄之義諷使再出竊又恐山靈笑我也

答吳柳濱先生簡

楨嘗謂孝之道甚博匹夫以力達士以祿隱君以善大人以名昔黃香扇枕斯須承歡孟博驅車百代藉

響然孟博爲勝楨願師終孟博之志畧斯須之節以揚百代之名退依云云非所敢贊也

與張南溪巡撫簡

今爲天下患者虜最稱鉅多寡強弱執不相當今言者酷責主帥恕論三軍何不知兵甚也宣大一隅創殘已極西北一面生靈所倚者元戎之力耳虜情叵測未可以遭創而遽弛吾備昨年不窺宣大而輕犯榆林茲有所向其旤大矣言之粟粟

與南姜泉儀部簡

久客京國不任煩囂亦擬奉母西歸依山結廬屏居

勉造期以不辱知己乃屢圖輒阻蹉跎班行非本志也

與徐少湖少宰簡

古道旣衰執絕者交疎望歸者情分乃比比然矣今公所延納鄙人者皆振古之遺風近世之希睹也卽且望華山往矣苟得假息歲年猶能究古人之學尋當今之務著之話言取裁有道若五斗相迫卽就宦轍則未能也

與朱碧峰先生簡

近世仕宦多術巧者得奎往往掇拾邊檄傍竊緒綸

次而爲書且布之人曰夫夫也明戎知兵是嬰情世
故者無何卽當一而比不驗所云至敗卽斥去若已
冒榮名羸厚利矣楨嘗謂當事者用人若畧名覈實
獎恬抑競則用罔非才

答謝畹溪巡撫簡

自得歸依棲頗就閒適乃部檄趣還弗獲堅守鄉園
然欲去復止止又欲行適迤節月依戀慈榻此所謂
去父母國之道也

與張太谷中舍簡

初楨之歸也念先贈君權厝非所且二十年乃捐費

儲俸易地一區謀所謂吉徙之事甫興輒罷本力不
贍又信惑術家語也積衷幽憤何時獲展邪抵家來
親志予情悠悠甚適乃去秋部檄趣入勸行亡論百
輩而老親故苦逆旅不欲更去以是依戀遲回至期
始發耳然心痛兩親沒者如彼存者如此每從餞筵
中聽驪歌心折骨驚便欲截轅從好非飾言也

答鄭一山督學簡

楨植性骯髒不能作婀娜諛媚狀自與海內人士遊
往往始忤終合竊不敢輒附千古昔切切惻惻之義
然于世之面諛背詆者異矣

白里中親友簡

鄙人且去鄉土義須就諸長老白請離教迺顧早承
招邀稱送行子卽已戒僕待命宴日爲上元後夕雲
月漸豁良宵嘉晤生平幾逢乃探囊中買賦金獲此
餘屑聊助華筵因思少陵偕劉法曹宴集石門詩能
吏逢聯璧華筵直一金今花宮酒費奚啻一金然以
楨陪侍可山戶曹人其肯辨聯璧不也走伴齋金往
附之瓊言

與顧六泉督學簡

士人讀書希功名冀以効用身冠珮而蘿薜其語皆

本集卷之二
違心之轂非其好也顧物情牴牾時時有之則鄭旦
不得爲妍西子不得爲潔雖有黃金無柰衆口

答彭豫齋大參簡

往公嘗計以親老解官若竟獲遂僕于其歸日當采
華山黃精寄致宋中予以饌親延歲公亦當攀二室
三花報我爲北堂懽也

與汪春谷太常簡

楨西鄙人也少聞里中先輩談干戈戎馬之烈講規
畫建置之畧長又見從軍行兵經過華下者無論數
十比其卒成敗利鈍一一在臆窮知其本竊自謂異

時幸爲國器當効一割之用至文墨之技本非性能
又尠師授間屬一詞聊以官守在是率情漫漫而已
與張南溪少司徒簡

楨按古之對大烈厲大名者率皆非常之士然非常
之士非常人所識故每不通于常人之論一遭唇吻
竟就淪埋謫篋矢書卽賢者無以自理此翁所以去
榆鎮也

答鄖陽任巡撫簡

鄖地控治三省寔稱要害謂其山博而奸伏治兼而
俗異也翰云其地天空鳥絕與性相宜古者塞外撤

守烽煙不作則風日昭曠故天空林野寧棲故鳥絕
鄖故多寇盜今稱天空鳥絕西南殆寡事矣

答劉一軒侍御簡

使者奉 天子按部察奸本至威重矣或復作意揚
厲之於是部中弗靖媥邪脫網譎謀百出不可窮詰
始之明法法卒以敝何者患坐好異而不務要實也

與孫右川太守簡

襄垣令王尚禮者僕知其爲人也庶直方正不能媥
媥媚世蓋天性也自服官來以官者守法而治民故
撓法者臯殃民者刑一意向往畧不左右顧於是苟

擊掩襲戈矛交集此乃所以傷也令得臯于人情不得臯于法今守法者危則徇情者衆斯治之弊也明明知非臯而卒不與直者徇情者也陰陰知報怨而卒令弗行者護法者也公護法洞寃卽有巧佞不得施爲令解網羅惜羽毛者公也

答盧書菴方伯簡

秦人不善宦而善任事故超歷顯赫十無一二至邦有紛難則屬之矣公久歷晉疆飽諳邊計明日仗鉞登壇其思所以答群望可也讀中秋之什在刻者咸當讓驅夫詞章事功其極一也識淺而弗鉅機室而

弗圓均未之有立

與盧涑西少司成簡

仕宦由北而南者譬之征鴈有及春蚤歸者有歷夏
孟始歸者則羽翼健弱異也夫士亦有羽翼北轉淹
速亦與鴈同則僕難言之矣

答傅應臺巡撫簡

近世士論右拘忌而左弘博以爲拘忌似謹弘博似
通也庶政多隳識此之由夫守官與建功異道清談
與實用殊情今累尺寸積歲月薦升遠峻者非少也
然瑰瑋之士鄙之夫君子所遇猶麟遊鳳棲跡彰文

著可也泯泯循循需時盼調此中才等務耳楨固謏
末誠不願爲

與饒仁菴太守簡

公按吳叢稱籍甚乃忽領郡符何也貞士引繩巧宦
營便自古有之矣鳳陽 太祖興王重地聞其勝卽
漢之豐沛龍蟠虎踞王氣榮光時時見之游此可以
鬼目蕩胸增拓意樂第僕不得一往償所願焉古稱
淮泗之間多猛士才官今黠胡爲患求所能擊胡者
未得立可選徒徵發令赴戰壘卽公身繫民社力實
効戎伍也

與張重卿太守簡

僕觀當今吏治率右儂巧而左忠信蓋忠信之吏實
惠在民而身謝名跡采風使者以爲無赫赫譽輒掉
頭不顧彼見其弗利往往遷志從俗苟可釣竒營便
不恤其他此下民所以怨咨而治安之效未睹也

與王三渠少宗伯簡

秦中山川突兀士生其間者往往跌宕疎鹵與世相
左性旣違俗宦乃不達蓋自古若此矣翁敦大渾涵
時人比之叔度末路修廣可占而知楨不脫秦俗恒
自抑之卒未能固不知我所稅駕矣

與劉月山少參簡

區區愚伉譬之高巖獨對烈風四會長河片帆海若
吹波能不摧拔覆沒者亡幾由今以往萬里之騁跬
步之踏不爲喜不爲懼也

答周石崖憲長簡

奉翰論中多悃憤之詞招悵之意自聖人不免于狐
裘之憎曾參大賢或人負之以殺人之名茅絲同紐
竹栢異心嫖母爲妍閭媼爲醜蓋自昔云然矣

與尹朔野太守簡

今馬市旣開寇掠不免斯其情難測擬矣卒之用公

筭譬之醫焉凡公計皆調元氣補榮衛彼按摩熨灼
第救斯須之痛賴以起痾還壯未能也贈詩稽滯迄
今大抵美言可市而憤發之詞動觸時忌以故悠悠
未竟耳諒公能鑒我也

答謝與槐少叅簡

夫同舟而濟一值狂颶舟中之人不俟教誡拉柁持
篙維纜相連者何也共患難也君子之于人國義亦
類此

與喬三石大叅簡

鄙人從老母志便道還廬里中風俗日新長老苛責

以貌而少者往往出與抗禮居已于伉與折而爲踰禮之恭皆非也幸公教之

與趙守朴大司馬簡

今馬市之議罷舉兩存未有所決卒以何者爲久道上計臨岐路而踟躕思之雖審日暮途迂不能抵所止也公握長筭馭遠駕宜定一畫不挫于唇吻鄙人之言越俎矣

與張東沙少司馬簡

楨關西鄙人不習文墨之事雖守在詞曹實未有睹追憶里中先達若空同漢陂對山諸先生者此皆主

盟騷壇擅殼當代楨頰而自顧有怱然之懷焉若以其故謂關西生盡能文是邯鄲無醜女幽并無懦士也

與謝與槐督學簡

西京才今悉集長安城中矣公采擷校之所得幾何人在昔稱才難今信之不江南以舉業爲耕織諳于斯路秦中本尠的傳而士習又惰此業所由荒也

與徐儀岡給諫簡

今天下萬事皆異于昔時最急者虜患也竟出何計力能制之令不更來哉謀國之臣畫竒百數莫若用

人用之而當百廢百興矣用之不當百興百廢矣故
已疾先本立事先人

答韓苑洛大司馬簡

頃有言翁耳目聰明稍改于舊者楨以爲此或托而
逃世適奉翰諭而朝邑人士亦頗言之此蓋天欲完
賢者之節故令病廢不欲置之危苦以喪生平如頃
歲所歷睹可歎也

與張元洲兵憲簡

公負詞華兼繕繪事今當關峙者有華山遶關流者
有黃河此真畫圖中物也得暇能爲一揮寄致遠人

不遠人方懷故國山水日入夢思又懷君侯幸獲斯
圖卽不奉顏色還故國然念且慰之

答任櫟山太守簡

江南諸郡率多靡敝寢格之政究之則士人好議有
口仕者懼不便輒濡忍相習而事姑息此于身圖不
傷得矣而法紀日瀾倒不之顧也惟君侯圖之

與張石渠給諫簡

往僕在史局時自以旣不閒筆札之伎他日或當備
驅使乃蒐羅古今奏疏徧讀焉在 本朝則楊遂菴
王晉溪此兩公者蓋凌跨前後矣夫持文墨之論則

以華沒實循行移之體則陋而無觀均之非疏格也
昨奉公教云見楊疏久顧獨未見王疏而僕蓄有王
疏二乃分一以補几閣之缺誠謂倉公固國手然亦
須禁方乃益神其效也若僕者猶之箝中醫不識尸
蹙非其任不能起病子亦空讀本草耳安足稱哉

答閻濯溪侍御簡

今天下外臺二撫臺主在輯和按臺主在摘發職也
若撫臺不能其職而按臺徒泥陳調坐觀呻吟不爲
施砥砭將柰百姓何今公定畫一之則興便民之政
諸郡士民翬然稱快喁喁仰戴以爲父母夫按臺旣

已號鷹鷂而人又父母之彼撫臺者媿死矣

與王子臯給諫簡

方今胡騎大侵倭舟橫驚中原之盜雲擾而鼎沸救之安所托圖之安所先既得上計願草奏行之鄙人越在江介乃喋喋言事者以爲士之居世猶處大厦之下歛而風雨震凌桁棟搖曳其下處者安能寐乎此所以云云也

答姚惟貞侍御簡

鄙人自結髮時卽有志當世之務迨茲旣衰度不能罷之夫念在則百物皆重念去則百物皆輕此人情

大都也鄙人旣罷邁往之念乃其視世俗紛華與虛舟飄瓦奚異

與王思質巡撫簡

經國之臣率言置將益官如今所云若以爲淮陰得韓信洛陽得劇孟者獨不思信領漢軍十萬乃始橫行趙衛之郊設孟當從征時微刺客千餘人身且爲禽何以立功于行間哉夫置將不置兵益官不益卒猶之倉公就病家遺刀圭砥砭而不持論證雖詳何救于危

與何太華總督簡

公一出爲 國家銷未萌之變貽萬世之安厥功大矣歸而理舊業講計然之策所謂旣以施之國又以用之家也人生以百歲爲期公之年今六十有六其距百歲董董三十四春秋耳終日揮金置酒集諸社中故人以博飲取適然流光驟驥卽百歲且飄忽至矣彼勞勞塵劫何爲乎僕且圖請告作終老計將貸公家錢鉅萬廣置田園恣所欲爲期以他生償之彼瑜伽輪迴之說可睹也不識公肯邪不邪

與許少華巡撫簡

公得遂初服竟日開口笑私宜自較以視在鎮之日

則孰爲快也人言公勁健渥顏如丹似有得餌砂抱
真之術者僕慕之最甚少選請告退依華下當撰杖
屨從公遊衍顧僕有老親在不得講事舉術卽且奉
玄緒真言得住世千年足矣

與薛方山憲副簡

今時已春莫新水灌渠宜卽理楫北邁酬知己之私
若肯軫懷離緒枉帆燕子磯下僕當攜酒一壺走大
江之濱觴公不則亦任所由而已

與趙大洲光祿簡

老奴齒髮衰暮矣不堪雕蟲且厭驅馳行當過商顏

山下將弔四皓之遺踪采芳嵒之故芝招赤松問石髓求長生益筭之術與山靈共老卽有餘藥欲以分貽同好非調語也

答王仲山提學簡

夫人情不割升斗必就纏籜此亦大都然矣顧念黃鵠高舉不啄堦下之食籠中鸚鵡暗其橫絕繫而不得去乃知羽毛爲累多智非福也以君侯知己特爲論之云爾

與唐霽軒巡撫簡

僕伏山中一歲餘而十室九空日不能再食者比比

益之有司貪虐巧于朘削以罔上而希譽僕每游村落間與父老班荆坐談聞其說輒對泣如雨然莫之控訴也今歲又大侵江南之賦缺而不入內帑之藏出之無窮大司農告匱者屢矣恐無以遂所請振關中之飢獨且柰何

與趙大洲光祿簡

兄負當世之望志在濟艱持厄振頽綱扶積弱此人人所明也顧坎壈不離其身斯其故可知矣老氏之術本欲有爲而陽示無爲其道居在吾儒之右不可弗之講也

與王穉川少司成簡

大洲氏睹人情世事一不當意輒發憤不平此恒情大都也古人之言曰聖人憂治世而不忿世言人品各異等徒嫉怪之亡益耳趙氏稱服公至數矣言必見聽豪桀遭遭有相成之道焉與庸衆不同其念之若僕旣計在引避則放浪形骸之外亦得矣不問人情世事亦任所由而已

答任棠山太守簡

近世受簡爲文者往往獻諛効佞漸之而成俗矣故暗其浮宕之詞構架之事遂以爲喜不則吟吟咨咨

黯然弗快焉今足下不以僕之詞爲背俗而顧以爲快其度越世人之見遠矣

與薛方山憲副簡

順天試錄一本奉覽錄中論語義及孟子義詩第一義易二篇春秋二篇表一篇策一策三策五俱出老奴之手充國旣老安能與驍將鬪也秦中錄傳言公爲總裁盡與刪潤然僕讀之疑焉孫吳習兵豈宜學偏裨小帥布陣躡步而不講于神變之術也附此問焉其他省見錄四種同往

槐野先生存笥稿卷之二十七